



Republika e Kosovës / Republika Kosovo / Republic of Kosovo

Kuvendi Komunal Rahovec/Skupština Opštine Orahovac/Municipal Assembly Rahovec



Drejtoria Komunale e Arsimit Odeljenje za Obrazovanje Department of Education



REPUBLIKA E KOSOVËS
REPUBLIKA KOSOVA
KOMUNA E RAHOVECIT - OPŠTINA ORAHOVAC
Drejtoria për Arsimit
Odeljenje za Obrazovanje



-IV- Nr. prot. 300 Më 09.10.2019
Br. prot. RAHOVEC - ORAHOVAC

Informatë e DKA-së për fillimin e Vitit të Ri Shkollor 2019/2020

Datë: 09.10.2019

Të nderuar!

Drejtoria Komunale e Arsimit gjatë gjithë muajit të fundit ka punuar dhe ka bërë të gjitha përgatitjet e duhura për një fillim të mbarë të vitit të ri shkollor 2019/2020. Në fillim të muajit gusht, kemi analizuar me kujdesin më të madh gjendjen e personelit mësimor në të gjitha shkollat e komunës sonë, duke bërë një planifikim dhe një ri sistemim të kuadrit mësimor sipas profileve mësimore në të gjitha nivelet, duke filluar nga niveli parafillor e deri tek niveli i mesëm i lartë.

Si rezultat i planifikimit të bërë, kemi patur edhe një konkurs për plotësimin e vendeve të lira në disa pozicione në shkollat e komunës, shumica e të cilave ishin zëvendësime, pra pozita me kohë të caktuar. Drejtoria Komunale e Arsimit ka marrë të gjitha masat që procedura e konkursit të shkojë mirë, duke respektuar të gjitha afatet ligjore dhe udhëzimet administrative të MASHT-it. Ky konkurs u hap në përputhje të plotë me Udhëzimin Administrativ 10/2018.

Gjatë muajve të verës u mbajtën edhe një varg trajnimesh me arsimtarë e mësimdhënës të fushave të ndryshme kurrikulare, të cilat ishin të nevojshme për ngritjen dhe përgatitjen edhe më të mirë profesionale të mësimdhënësve tanë.

Në fund të muajit gusht, nga Ministria e Arsimit kemi pranuar të gjitha librat/tekstet shkollore për klasat 1 deri 9, të cilat fillimisht i kemi vendosur në pikën grumbulluese dhe pastaj ato i kemi shpërndarë në të gjitha shkollat fillore të komunës sonë. Fillimi i Vitit të Ri Shkollor si në mbarë Kosovën, edhe tek ne ishte më 2 Shtator, ditë e hënë, dhe që në fillim, të gjitha SHFMU-të e komunës sonë ishin të pajisura me tekste shkollore, mirëpo kemi disa tekste të lëndës së kimisë dhe artit figurativ për klasat e 7-ta, të cilat Ministria e Arsimit i ka vonuar dhe ende nuk janë shpërndarë. DKA ka grumbulluar të gjitha kërkesat e shkollave për lëndë djegëse që do të përdoren për ngrohje gjatë muajve të dimrit, dhe furnizimi është bërë në shumicën e shkollave, përveç 2 shkolla të cilat do të furnizohen shumë shpejtë. Në bashkëpunim me Zyrën e Prokurimit jemi kujdesur edhe për procedurat e prokurimit për lyerjen dhe mirëmbajtjen e shkollave, por për arsye të zgjatjes së këtyre procedurave ka pasur vonesa në realizimin e kontratave për lyerje dhe mirëmbajtje të objekteve shkollore, siç ishte rasti me shkollën fillore në Xerxë. Kemi filluar dhe është gati në përfundim realizimi i projektit të instalimit të ngrohjes qendrore në 3 shkolla të komunës, në SHML „12 Maji“, në SHFMU „Sapniqi“ në Sapniq dhe në SHFMU „Faik Konica“ në Celinë, ndërkohë që ka filluar të zbatohet projekti i efijencës së energjisë në SHFMU „Vëllezërit Frashëri“ në Drenoc. Shkolla „Mila Milaim Krasniqi“ në Pastasel është poashtu në programin e efijencës së energjisë dhe kemi marrë konfirmimin nga MZHE që së shpejti do të nisnin procedurat e prokurimit për realizimin e këtij projekti. Gjithashtu, gjatë muajve të verës ka vijuar të realizohet dhe pothuajse është në përfundim drenazhimi dhe hidroizolimi i dy shkollave,

ka përfunduar shtrimi i dysHEMEVE të SHFIMU „Dëshmorët e Lirisë“ në Pataqan të Poshtëm dhe është kryer rrethoja e SHML „Xhelal Hajda-Toni“. Ka vazhduar ndërtimi i objekteve shkollore në Hoçë të Vogël/Brestoc, në Retijë, ka vazhduar ndërtimi i çerdhes në Ratkoc dhe presim që në fund të muajit nëntor të përfundojnë të gjitha punimet në ndërtimin e çerdhes në qytet dhe ajo të jetë e gatshme t'i prejë fëmijët e moshës parashkollore. 12 shkolla të komunës sonë kanë vazhduar zbatimin e projekteve të fituara nga Banka Botërore, në kuadër të të cilave janë bërë disa furnizime me pajisje laboratorike dhe teknologji informative. Gjithashtu, DKA ka kryer furnizimin me pajisje të Teknologjisë informative në disa shkolla, ku janë furnizuar me kompjuterë dhe Smart Tv. Në bashkëpunim me DKRS-në kemi lidhur një kontratë për furnizim me libra të bibliotekave të disa shkollave.

Me keqardhje duhet t'ju themi se trendi i rënies së numrit të nxënësve edhe këtë vit është shumë i madh. Kështu, sipas evidencave të nxënësve të regjistruar në këtë fillim viti shkollor, në shkollat fillore dhe të mesme, nga klasa 1 deri 12, gjithsej në nivel komune, në këtë vit shkollor kemi 410 nxënës më pak.

Zvogëlimi i numrit të nxënësve ka shkaktuar probleme sepse ka ndikuar edhe në zvogëlimin e numrit të klasave dhe për pasojë edhe zvogëlimin e normave të mësimdhënësve.

Ne kemi qenë dhe jemi vazhdimisht në kontakt të përhershëm dhe në vizita në shkolla dhe sipas të gjitha të dhënave që kemi, procesi mësimor ka filluar mbarë në të gjitha shkollat.

Drejtoria Komunale e Arsimit ka bërë gati një plan me një varg aktivitetesh dhe fillimisht kemi filluar vizitat e zyrtarëve të DKA-së në të gjitha shkollat. Vizita të këtilla nëpër shkolla do të ketë vazhdimisht sepse synojmë që sistemin arsimor të komunës sonë ta ngrisim në një nivel më të lartë, që siguron arsim cilësor.

Avni Morina, Drejtor i DKA-së

